

## No. 138. 1423. 1459.

*Innungsartikel der Weissgerber.*

Anno domini millesimo CCCC° XXIII°. Wyr burgermeister vnde rat man der stat Lypczk thvn kunt vnd gebyten von vnserß geneydigen hern des herczogen weygen den ersammen meystern der weyßgerber bey gehorsam, das sy sich zcu-sammenfugen vnde halten sullen also sammentlichen vnserem genedigen herren vnde der stat zcu dynen, wv vnde wen das not seyn wirt, vnde geben dem opgenanten hentwercke noch gewönelicher weysse, also dy andern hantwerge phleygen zcu haben, czwene meister Nickel Remen . .<sup>1)</sup> vnd Andres Brawer, das sy bey der busse VI phennynges den andern meistern gebyten sullen vnde och ander meister kysen, dy der stat vnde des hentwerges noz vnde fromen erkennen mogen. —

Dyß ist das anbegyn vnser geselleschaft, dy vns gegeben ist von vnsern geneydygen hern den herczogen vnde von dreyen reten, also neymelich uf dy czeyt geweyst seynt burger meister dy ersammen myt namen Nickel Staus der alde, Kunradus Ber, Peter Ylburgk, myt wissen vnde folwort aller dreyer rette.

Dor noch vber etlich iar nemelich also man screp M° CCCC° dor noch in dem LVIII iar hat das obgenante hentwerck der weyßgerber broche vnde erthvm, dy vnder yn enstenden seyn, erkent vnde vorbrocht, nemelichen vor dy burgemeister vnde rette, dy uf dy czeyt gesessen haben, mit namen doctor Jocuf, Hans Tömel, Renhart Goltsmyd vnde alle drey rette, dy denne an gesein haben des hentwergeß vorbrengne vnd zuegelossen haben sulche stücke vnde artykel, dy das hentwerckg vor das beste, der stat zcu eren vnde zcu redelickheyt vnde dem hantwerge zcu-nocce erkent het. Dy zeugebunge der genentten rete also lauten:

Wyr burgermeister vnde rotman der stat Lypczk thun zcuwysßen in desen scryfften. Noch dem also dy ersame meister der weyßgerber ene czedele der orkunde, dy von yn allen gefolbort ist worden, vorgehalten vnsern rot, dor zcu begert vnde gebeyten haben, yn sulche stücke vnde artykel zcu czugeben vnde zcubestetegen, also habe wyr sulche artykel vnde geseccze myt vorrote der eldesten vnde aller dreyer rette vorhort vnd genuelichen gemerket vnde geben yn zcu, sulche ordenunge zcu halten bas uf vnser wederruffen, vnd sulche artykel vnde seccze luten, also her noch gescreben sten:

Item zcu dem ersten mol, wen der bote vmb lauf vnde kumet weder in des meisterß hauß, der yn auß gesant hot, so sal her uf stecken eyn licht enes fyngers lanck; wer nicht kömet er das licht außgeet, der sal bussen myt sechs phennyngen. Item wer meister werden wyl, der sal das hantwerk mute uf czwu morgensproche, neymelich wen dy meister ir byr haben, vnde och sal her from vnde elich geborn sein vnde dem rote gute genock zcu enem burger. Item och sal her gefreyet haben elich zcusein, eß sey denne das her enes meysters son were. Item och sal enes iczliches meysters son seyn hentwerck frey vnde ledick haben, auß geschlossen wachß

1) Or. *suller*.